



## Faasnacht 2023

Y spaar e ganz e Huffe Stroom. Y mach das für s Vaterland.  
Y stell e Cherze in Stall und mälch wie friehner nur vo Hand.  
Y due d Unterhose cheere statt in d Wöschmaschine gheie.  
Dank miir cha me s z Adelboode drei Sekunde lo schneie.

Wäär dr Gianni Infantino e Täl vom Buurehoof,  
wäär är käi Gäiss, käi Guggel, käi Chälbli und käi Schoof.  
Är wäär au käi Traktor, aber öbbis schwöör ich Ihne:  
Är wäär mit Sicherhät die beschti Mälchmaschiine.

Y ha die Buess jetz zahlt, ohni Schuld z anerkenne.  
Es syg verbote, füdleblut mit de Hühner umezrenne.  
Y ha doch alles richtig gmacht. Wo isch dr Fehler? Wäiss dr Gäier!  
Es hangt e Schild am Hühnerhof: «Heute Freilandeier».

Friehner het me Schugger gsäit. Schrooter hesch au ghöört.  
Hüt sääge alli Bulle, was my Muuni grausaam stöört.  
Dasch voll sexistisch, schimpft er und säit denn no ganz lysli:  
Wäisch, liebe Heiri, ganz tief im Härz bin ych e Schuggermysli.

Kulturelli Aaäignig: Vellicht verschtosch das duu.  
Y halt my draa. Dr Hofhund häisst jetzt nümme Winnetou.  
Das macht dä hässig. Är schnaubt und tobt, är runzlet syni Stirne  
und säit mir anstatt Heiri jetz «Häuptling Weiche Birne».

Y ha mr am ESAF vorgstellt, im e Momänt, eme lyyse,  
es gäbti d Basler Regierigsrööt doo als Lääbendpryyse.  
Nääbe Äierchocher, Toschter, eme künstliche Bluemestruuss  
gseecht sogar dr Chaschper Sutter irgendwie no bruuchbar us.

Y han e Huffe Säuli. Y behandle alli glyych.  
Y ha jedes schampar gärn. Das macht mys Lääbe ryych.  
Ob binär oder nonbinär stoht bi mir nid zur Debatte.  
Am Schluss lande alli zämme mit Suurchrutt uf ere Platte.

Dr Roger, dä säit: Aadie, schöne zämme, tschau.  
Y hänk my Schleeger an Naagel, blyb dehäi bi mynere Frau.  
Sys Chnüü wot nüm, drum muess er läider sy Karriere beände.  
Jetzt bin iich die letschti aktivi Baselbieter Legände!

Au iich ha dä Beschatter gluegt, das häisst y ha s probiert.  
S Groosi säit, äs chiemi druss, was my grausaam deprimiert.  
S wird pööblet, gschroue, gschosse, sy gingge au e Dür yy.  
Und wie im wohre Lääbe: Dr Chef, dä chunnt us Züüri.

Hesch ghöört, d Balletschuel macht jetz zue. Das stöört my ehrlich nid.  
Y ha my immer gfrogt, öb daas an de Zeeche Blootere git.  
S Theater suecht jetz käi Ersatz in Russland oder China.  
Basel het jo mit em Beat Jans e Prima-Ballerina.

D Eva Herzog stammt us Prattele. Gäll jetz syt dr froh!  
Näi diir häit nid verloore, die isch jo gar nid vo doo.  
Schaad häit dir nid um Hilf gfrogt, jä dasch jetz wüchlich dumm.  
Eva, s nöggst Mol machsch bi mir e Schwarznaasepraktikum.

My Muuni het beschlosse, är sig jetz neu e Chue.  
Är moolt sich d Chlaue aa und d Lippe root drzue.  
Är trät transparänti Bluuse us zimlich tüürem Tuech  
und säit: Hey Heiri, wirsch es gseh, nöggst Johr schryb iich es Buech.

Me säit nümme Plauderi. Das isch hüt e Daateleck.  
S BAG isch genau so dicht wie myni Jutteseck.  
Me wäiss nid, was dr Berset wäiss, vellicht duet är au liege.  
Wenn dä no lang so wyter macht, het er glyy meh Zyt zum Fliege.

Wenn y die Gletscher schmelze gseh, denn fang y afo gryyne.  
Y hüül wäge Afghanistan, Iran, dr Ukraine.  
Die ganzi Wält isch durenand, isch totaal vom Wahnsinn packt.  
Nur Basel tickt, wie wenn nüt wär: Zämme im Tackt.

Das Feschtprogramm am ESAF han y dernääbe gfunde.  
Die häi fünf Dääg dr Siigermuni an e Feschtzält bunde.  
Das goht doch nid! Au iich bechäämt Härzraase und Tromboose,  
wenn iich miessti stundelang Beatrice Egli loose.

D Swiss Indoors bald in Züüri: Gäll, jetz häit dr Schiss.  
Käi Muba meh, käi Baselworld, s herrscht Veraastaltigsfinschternis.  
Bald s Musicaltheater zue. Doch machet euch käi Sorge:  
Es blybt für euch als Top-Event dr Heiri Buure-Zmoorge.

Myni Hühner häi e Naame. Y ha neu us Amerika.  
Sy häisse Jane und Meghan, Priscilla und Jessica.  
D Meghan het total afo spinne. Jä, die wäiss, wie me Lämpe macht.  
Em Groosi längts. Es handel. – S git Chicken-Burger zum Znacht.

Wenn du Tier in Oobhuet hesch, griegsch ständig uf e Latz.  
Hesch em Chälbli s Gnick massiert? Het jedi Sou gnue Platz?  
Vergliche mit em Zolli blybt miir e Huffe Mäis erspaart:  
Stell dr vor y hät e Panzernashorn und e Leopard.

